

摘藻堂四庫全書薈要

集部

欽定四庫全書薈要卷一萬六千八百二十二

集部

震澤集卷六

明 王鏊 撰

詩

次韻林都憲待用蜀中行師二首

草檄軍前立馬鞍
寄當分閫肯辭難
城高白帝休番戍
路繞烏蠻費折盤
妖祲潛消邊日煖
陣雲低壓瘴江寒
何當奏凱歸朝署
還整當年舊豸冠

單騎曾先萬馬羣
綠林諸盜伏斜曛
要令孟獲懷諸葛
又見曹軍怯趙雲
千里仁風行若偃
三年炎毒坐如焚
平生丰采傾朝野
蠢爾羌夷豈不聞

飲陳以巖領孫堂

雲母屏深燭影斜
德星還聚太丘家
庭前玉樹森林立
池上超宗敢漫誇

夜過西虹橋

破楚橋邊步偶停
夜船燈火散如星
館娃歌舞今何處

留得吳歌與客聽

賀師邵初授御史次師陳韻

越溪芝秀麗春晴瑞應人傳豸府名
一日文章驚豹變
百年風節愛冰清
大廷糾劾當宸立
秘殿傳宣傍輦行
聞說馬周工獻替
九重還補舜聰明

題舊寫真

莫言故我非
今我只恐前身異
後身自是壺丘生
不定丹青雖妙若為真

贈僧還杭州

徧游鴈蕩與天台少室靈巖到五臺自是此身無係着
信於何處見如來高閒作字元非幻靈徹題詩漫倚才
慙媿韓公長擾擾窮年學道只空迴

訪徐季止於瓜涇

太湖東轉碧溪斜來訪南州孺子家舊學不嫌樊氏稼
閒情兼種邵平瓜畫船載酒人如玉醉筆題詩墨似雅
好約年年為此會前村蹋雪看梅花

襟帶江湖樓為仲山都憲作

三江東去五湖西特起高樓枕碧溪
桐里波光天外小洞庭山色雨中迷
人懷范蠡舟難及地壓滕王閣盡低
猶有仲淹憂不忘倚闌無語到烏棲

題秉之塘橋新樓

惠連特地起高樓准擬當時上相游
林屋兩峰從海湧太湖萬頃接天流
日陳六藝兼諸史勢壓三山與十洲
無限風光無限思賦才須是仲宣優

登陽山太石

陽山從西來勇氣正咆勃聯峯劃中斷散作石突兀不知開闢初誰剗造化窟偶來陟其椒未步先欲蹶儼如大廷朝冠冕森萬笏又如羽林軍戈劍羅勁卒抉開混沌竅截斷防風骨嶮礧唇吻張璀璨鼻眼突嘗疑地生瘡又恐天墜字嵌巖亦通透軒敞且蒿萃梯空路不窮補缺屋將杌沮洳滴玲瓏豐茸眠猛狃縫生蘚駁斑罅卧松彊屈手摩畏猙獰足履愁艱琬靈湫瞰潛虬危巢

俯棲鶻佳處誠悠悠怪事良咄咄鍊疑媧皇遺墮恐共
工揆神禹鑿難平姱娥推欲沒太湖梧汀滢絕頂箭恍
惚作詩繼前游歸興殊忽忽

游天池和仲山韻

小輿詰屈穿雲岑愛此籠從萬石林迴溪倒挂松樹老
絕嶂半染蓮花深尋幽偶值此日暇訪古正愜平生心
天池小立戒歸去夜來風雨聞龍吟

徵明飲怡老園有詩次其韻

吳王銷夏有殘闈特起幽亭據要津
剩水繞時傷往事短牆缺處見行人
綠楊動影魚吹日紅藥留香蝶護春
為問午橋間相國自非劉白更誰親

偶成三首

墟落斜陽欲暮時烏紗醉岸髮如絲
山東未報收羣盜為問來鴻知不知

漠漠斜暉轉樹腰花前柳下步逍遙
忽思右掖門前侶隱几無言候早朝

習習東風皺水紋
花前柳下步逡巡
忽思左順門前侶
屈首無言向內人

登龍門次師陳韻

飛步凌虛碧嶂腰
雙扶聳屨逼層霄
嵌中祇恐蜿蜒蟄
缺處猶存霹靂焦
擘訝巨靈雄氣力
峙瞻元禮峻風標
知君頭角斬然久
只候秋風八月潮

靈巖山

天末遙瞻塔影層
今朝携酒試同登
吳中信是佳山水

人世依然感廢興
草滿琴臺微有字
烏啼禪院寂無僧
懸崖斧鑿紛如雪
何處題詩記我曾

考栳墩

栳栳墩前酒一椀
良辰勝友好徘徊
綠迴埜色隣隣繞
翠罨湖光面面開
墩姓祇今應我屬
風光自昔有誰來
懸崖擬欲題名字
千古行人首重回

游湖

游徧南湖又北湖
畫船隨處宿菰蒲
青深著雨山如染

綠淨無風水似鋪玉帶
蟒衣爭快覩鳳笙龍管
醉相扶
輕橈又轉東湖去何似
當年范蠡圖

韓文公藍關圖

為陳以
巖賦

韓公不信佛有信世有仙
牡丹花上誰所賦一朝雪擁
藍田關阿湘幻化有如此
神仙灼灼在眼前使公一語
稍低屈携手同往良非難
胡為騎馬浪自苦祇令收骨
江之邊乃知此公胸中屹
嶂有壯氣抵死不肖從湘言
當時果州有謝女白晝居
室生雲烟須臾上升衆所見

公謂魑魅物怪其逢旃後來儒者頗好異遂令末世坎
離龍虎紛紛傳乃知韓公不可及泰山北斗不獨文章
然

送吳縣簿董仁之任鄞丞

自頃權奸偷國柄一時在位貪相競剝民膏血輸權門
廉恥掃地寧復存誰知小官之中乃有吳縣簿守法廉
平獨如故三年佐縣民愛深視金如土民如金每言吳
人窮到骨吾此股削吾何心吳縣簿真難得我欲言之

顧非職一朝擢官向寧波於乎奈此吳民何

予伏林下覩閭閻之疾苦憫征求之繁多傷循吏
之難值也每以為歎癸酉六月客有過予談海虞
胡令之政者為賦詩

有客談胡尹炎歆座上清吳儂偏感德漢史不求名正
自催科拙無如折獄平懷哉不可借送子若為情

留別王濬之和文定公韻

小隱何年荻扁來陽城湖畔草堂開團蒲曲几凝香寢

町疇芳畦癭石臺雪滿山陰王子至日斜滌工醉翁迴
銅瓶早漏春消息欲取寒香入酒椀

鄒道士聽雨堂

虛白堂深夜寂寥初聞淅淅轉瀟瀟先聲似到梧桐葉
餘潤旋添杜若苗信有雷霆驅律令不須蜥蜴助喧呶
東先生去無人會空使巫尪得爛焦

贈仲山

東風漠漠動江蘼夾浦橋邊二月時花外小車來每早

竹西高閣臥偏遲
山橫爽氣閒支笏
座按新腔自補詞
聞有還丹須乞與
市中誰者是安期

癸酉春雪

南國春寒著弊裘
夜牕微霰聽颼颼
夢迴虛室驚先曉
瑞應新年望有秋
老樹滿庭森棨戟
小奚當戶擁貔貅
一朝頓咤貧家富
捧玉擔銀入茗甌

玉應爵侍御家園八景

愛山樓

懷親也

凭闌看青山欲去仍戀戀青山恒在茲而人不可見

靜觀軒

夫物各芸芸過眼摠超忽靜中何所觀靜觀本無物

栖霞亭

嵌巖何所有終年此棲遲世事正紛紛問渠渠不知

友石亭

巖巖太湖石與結終身契勿學市道交風波起平地

水月軒

明月墮流水流光終不定寒潭徹底清乃見本來性

慕濂亭

花中有君子濂翁後誰愛勿與流俗言牡丹時所貴
後樂亭

鳥鳴岼柳垂魚跳渚花落曳履涉芳園吾亦樂吾樂
味菜園

抱甕灌荒畦採掇恒在手何相莫子欺子媵動三九
與嚴太守道卿同登莫釐峯

微雨發春妍東風花外軟良朋約佳遊遙指莫釐巘平
生山水心老脚肯辭繭壺觴紛提携曲嶝屢迴轉小憇
山之腰秘境漸披蕨紫翠蓋幢翻青黃繡裯展須臾造
其顛四顧目盡眩太湖小汀澄風帆時隱見吳門俯可
掇越嶠杳堪辨摩挲舊題名班駁半苔蘚日斜下山椒
窅爾迷近遠問途值樵夫失脚悔已晚懸厓鮎伶俚絕
壑窺澗忍喜微認前村山寺吠鳴犬解衣得槃礴仰視
坐猶喘韓公鑄華嶽正自恐不免登高弗知狀持用戒

軒冕

與道卿鳴陽輩同遊法海寺循平嶺涉楊家塢還
飲偃月岡

忽忽春歸不可攀且乘高興看湖山迴旋翠壑丹崖裏
小憇青松白石間為愛韶華連日醉歷觀宦海幾人還
風塵楚蜀干戈地舉酒何緣一破顏

雲間曹憲副時中夢予抱病作詩見及有可惜中
興天下計歎留忠鯁老東吳之句因酬之

五湖三泖夢相通。知是平生氣味同。抱病不應如獻可。
解嘲那復似揚雄。自慙杞國憂天計。誰辨咸池捧日功。
多謝青山不吾負。朝朝長對白頭翁。

再遊南湖

漾舟出深港。舟人問安之。我行無定在。信彼天風吹。東
西與北南。遠近齊所宜。連朝風雨顛。晴明喜今茲。鳴笳
發湖口。蘭橈蕩輕漪。紅鱗潑刺驚。鷗鷺相與飛。扣舷激
吳歌。續彼滄浪詞。風雲忽變色。前山雨將來。勸君趣迴

棹無為遠崦嵫

送陳指揮蕃遷淞江都司

朝廷又起故將軍淞水吳山閫外分禹穴千年通御氣
狼山比日熄妖氛驃姚方畧今誰敵邵毅詩書舊有聞
楚蜀干戈猶未定早看幕府策奇勲

湖心亭

莫釐下瞰湖波水周垣忽向湖心起茫然萬頃銀濤中
幻出樓臺信奇偉坐疑海上閭苑與蓬萊飛墮君家亭

子裏長堤花柳青復紅曲闌直檻東西通龜跳魚泳鷗
鷺集相忘如在江湖中石梁倒影卧水底無乃下占馮
夷宮桑田滄海須臾變高下帆檣牆外見鴟夷一去那
復來五湖風月誰家擅我今無事身自由良辰佳節長
來遊觀魚為謝臧僖伯看竹時同王子猷長風蕭蕭起
天末浪捲平湖半湖雪歸來還約中秋時把酒青天看
明月

戶部正郎無錫錢世恩乞歸養母作樓曰愛日子

為賦詩

日兮日兮咸池自出稽首向日兮其出遲遲願羲與和
兮無駛其馳日兮日兮虞淵自沒稽首向日兮其沒舒
舒願羲與和兮無疾其驅日之遲遲兮為我親以常好
日之舒舒兮願吾親以難老

贈錢元抑

詩裏休誇五字城一生文字學西京馬蹄蹠蹠東風裏
蹋遍燕南幾十程

過鄧尉山題天真上人新開禪院

手斲嵌巖鄧尉濱五湖風月自平分
鐘聲夜扣林間雨
蜃氣朝橫嶺上雲
慧眼又傳新法嗣
幔幢曾折古魔君
我來亦是尋常事
信息誰教野鹿聞

有約登天平絕頂者行至龍門力憊而止

峭峰突起萬嶺屹聞有仙局惜未觀勝事有懷行獸往
懸厓無路坐長歎龍門已覺吳天隘劔閣誰云蜀道難
安得我身生兩翼凌風直上謝蹒跚

天平范氏墳

哀年不減登臨興福地靈山搜欲罄城西諸峯吾所嘉
就中尤愛天平勝亭亭一蓋倚蒼冥儼若端人人自敬
獅山奔伏象山迴支硯秦臺皆退聽橫山當面橫作屏
背擁蓮華互相映林林萬石相拄撐倚挿半天歌不定
蹲如虎豹奮攫噬騫如鵬鯨恣豪橫勇如武士力勗屨
秀如女子色媚靚我來敬拜太師墳松栢陰森趨一徑
忽瞻萬笏森向天直氣噴薄凜猶勁乃思范公立朝時

正色危言柱邪佞茲山固合生茲人崧嶽降賢尼孕聖
吳山第一稱天平宋家第一稱文正高風千古允作合
仰止巖巖續前詠

遊治平寺登吳王郊臺

朝發石湖濱暮抵太湖岸青山亦多情供我船中玩船
行山亦行一路青不斷白雲渺渺山重重不知何處昔
是吳王宮越來溪邊越城在夫差受困云在茲山中今
朝扣禪關訪古尋幽踪僧言事往那能識鐘鼓聲中度

朝夕郊臺漠漠麋鹿游茶磨團團蔓荆棘不須弔古傷
懷抱且欲憑高縱吾眺人家歷歷新郭里川瀆沄沄胥
口道吳江塔影崑山城一覽因之發長嘯天風萬里天
際來吳王郊祀昔日登斯臺千乘萬騎湖上下祇今安
在唯見山雀窺船去船來湖西畔青山無言人自換來
來去去世無窮莫學牛山獨興歎

金澤僧辨如海年八十九矣手製蓴菜併詩見貽

因和之

玉盤急足送尊絲風味鮮
辛慰所思金澤老禪三昧手
當時張翰未曾知

送蕭尹九成

吳楓葉落洞庭波之子還朝整珮珂
千古湖山添保障三年邑里減征科
游從摠為斯文在瞻戀其如父老何
白首林間睇霄漢青春事業莫蹉跎

次韻徵明失解兼柬九達

野渡空橫盡日舟
蒹葭生滿白蘋洲
毛嫱自倚能傾國

梯稗寧知賸有秋，學就屠龍誰與試。
技同操瑟不相謀，人間得失無窮事。
笑折黃花插滿頭。

碧螺峯

儼雙峯兮亭亭，忽霧繞兮雲橫。
岡巒紛兮離合，澗壑黯兮崢嶸。
望夫人兮不遠，路杳杳兮難征。

甲戌春偶成

正好春光二月天，梅花如雪柳如烟。
那堪日日風和雨，辜負穠華又一年。

二月十二日雪

正德九載春開歲始十日青天忽聞雷遠近驚辟易雷
聲甫云收大雪忽盈尺連陰二月中節候過驚蟄春分
晴復雨雨後雪仍積柳條壓將摧梅萼凍全圻園林諸
草樹勾萌吐仍鬱頗聞春秋書又覽月令說從來天人
際茫昧固難詰寄語傳巖翁誰歟秉調燮

苦雨和施鳴陽

十日愁霖一日晴晴時旋聽屋檐鳴摧頽楊柳春無奈

狼籍梅花夢自驚
觸石玄雲隨處起
中天紅日幾時明
唯君不為衝泥怯
一慰閒居索莫情

與宜興邵天錫小飲象鼻嶺

漠漠輕陰雨復晴
晴時還不廢郊行
困依石几嵐侵座
醉吸湖波艷入觥
小圃荒畦春事動
落霞孤鶩暮山橫
何如罨畫溪邊路
共坐蘭舟蕩月明

至太倉欲觀海不遂

我欲乘桴從魯叟
一觀出日恨無由
扶桑只在船窗外

悵望婁江日夜流

舟中望崑山

雲外孤峯影墮江
船頭風浪共低昂
廿年舊事空回首
山自閒時人自忙

還至維亭

早潮時去晚潮回
陸市巴城邈迤來
咫尺維亭看又過
人生行止信悠哉

同年湯侍御用之自壽
春來訪予于吳中流連久

之時同年在者惟仲山世熙兩中丞因邀為石
湖之游日云莫矣直至上方而還因賦詩為別
二首

遲日溪山好放舟同人同作石湖游曲江雲侶嗟誰在
宦海風帆喜並收駕命淮南真繼呂堂開潁上獨慚修
莫言筋力非彊健昏黑還須到上頭

勾曲歸來訪故鄉姑蘇臺上看斜陽影同月下三人飲
目斷雲中一鳥翔往事悠悠餘雪鬢交情款款只霞觴

歲寒尚有籬邊菊欲伴韓公晚節香

六月十九日避暑偃月岡

酷暑人間無處避短輿侵曉過東岡
方塘曲澗清泉激翠竹蒼松白日涼
苔色使教鋪枕席藤枝聊可挂冠裳
渴心兩月今朝寫玉斗無煩勸蔗漿

東山圖寄同年謝少傅

謝公昔隱東山阿其如海內蒼生何
謝公今隱東山工海內其若蒼生望
東山何在雲悠悠乃在會稽東海之

東頭朝攀扶桑枝夕飲巖灘流謝公昔日登臨處今日
公來還釣游林間世事閱來久自信忠貞能不朽蜃嘘
樓閣倏當空世上浮名亦何有嗟予壯歲每從公公之
心事吾能通嘉謨動得明主顧勁氣直犯奸邪鋒奸邪
作奸今亦已中外望公猶未起老松眠壑無萬牛大材
為用真難耳平生不識王侯鯖屈鐵為鈎非所能讒煙
謗燄久自熄不煩桓伊仍撫箏

九月二日登高

重陽未到使登高萬里天風觸錦袍山色湖光兼雨暝
詩懷酒思入秋豪丹砂漫貯千年藥白雪先嘗九月糕
北鴈聯翩音信杳懷人無語首頻搔

與謝憲副德溫游陽山箭缺至半山寺而止

箭缺攬天知幾重半山聊復憇吾慵孤臣何處理幽憤

夫差殺公
孫勝於此

高閣閒來坐晏春深院潺湲鳴剝竹懸崖斫

磴偃長松迴船又過楓橋去臥聽寒山寺裏鐘

奉次楊新二閣老見壽之韻

只今廊廟有居州野渡宜橫一葉舟
月上東山成獨飲花明西苑共誰游
杜陵臥病傷今雨宋玉懷人感暮秋
多謝新詩寄林下壽筵無地獻觥籌

陳以鈞得子二首

半舫齋前種玉時森森纔見出牆枝
如今又見孫枝透鳳尾脩脩轉更奇

年踰耳順髮鬢髻其奈諸孫未見何
獨愛君家有英物峴峴頂玉幾摩挲

將游毛公壇宿包山寺明日雨不克往

毛公已去有仙壇眼見亭臺欲到難
翠壑蒼厓增愴恍
玉芝瑤草長闌干洞無金鑰誰能闖
井有靈砂尚可飡
傳語仙翁莫終棄當時鷄犬從劉安

次師陳西干草堂韻

晏子家居不厭囂年來市賈識偏饒
窓禽曉下窺書案
門柳時來繫釣橈剩水尚紆吳子國
小山寧受越人招
紅闌綠浪姑蘇境寶帶西來第幾橋

乙亥新正十日過陳湖二絕

漠漠湖光隱磧沙
陳湖東畔是君家
春來十日無人見
一樹寒梅已着花

年來身世摠悠悠
湯作陳湖兩日游
東望煙波雲萬里
逝將吾道付滄洲

二月真適園梅花盛開四首

萬株香雪立東風
背倚斜陽暈酒紅
把酒花間花莫笑
風光還屬白頭翁

花間小坐夕陽遲香雪千枝與萬枝自入春來無好句
杖藜到此忽成詩

香雪千山煖不消我行處處踏瓊瑤絕勝破帽騎驢客
風雪尋詩過灞橋

春來何處能奇絕金谷梁園俱漫說誰信吾家五畝園
解貯千株萬株雪

三月六日庭前柏樹有露如脂其味如飴或曰甘
露或曰非也作詩紀之

一樹瓏璵凍欲流
碎攢紅玉上枝頭
香分醞醪春誰釀
光映珊瑚夜未收
端謝仙人雲外掌
思霑暘者道傍喉
不知造化真何意
獨凭闌干翫未休

和九遠見招山行

閒居無送亦無迎
唯是看山尚有情
那更亞夫懷怏怏
却憐定遠策平平
登高眺遠眸方豁
度壑穿林脚尚輕
消夏灣前兩明月
我船終日畫中行

消夏灣

四山環列抱中虛一碧玻璃十頃餘不獨清涼可消夏
秋來翫月定何如

畫船棹破水晶盤面面芙蓉正好看信是人間無暑地
我來消夏又消閒

明月灣石板

巨石陂陀板樣平三山當面看雲生何當子夜重來此
濯足滄浪對月明

石公山石洞

石公之景殊不惡
巨石懸空歆不落
爭知不是補陀山
中有仙人儼纓絡

石公山試劒石

懸崖峭壁立千尺
有洞虛明忽中坼
吳王寶劒烏能然
恐是巨靈神斧劈

石公山

石公幽處無來跡
亦有人家散阡陌
我船欲開還不開
愛此孱顏蒼雪色

林屋洞口古井

聞有紫隱泉

真誥云包山有白芝又有隱泉之水正紫色華陽雷平山有田公泉飲之除腹中之

蟲與隱泉水同味云是玉砂之流 悶在靈仙境金庭不

可扣且此汲寒井

洞口有深井雲漿湛虛空我來携一甕會與仙源通

徐氏薜荔園

花木年深錦作圍日高澱紫滴成霏鴈聲晚過橫山遠
帆影春歸渡渚稀木末芙蓉風盡落牆頭薜荔雨多違

却嫌舊日園林主鳳沼承恩久未歸

五月十三日過東岡看新竹時楊梅正熟紅綠掩映甚可觀也詩因及之

新竹娟娟舊竹斑東西儼立萬琅玕彊鞭迸占青松地
清蔭濃添白石壇羽扇動搖香粉墮楊梅點綴絳星攢
我來避暑年年事錦籜無煩為製冠

慰東之

功名不用嘆差池利鈍人生固有之襄野迷途迴未遠

邯鄲榮夢覺多時尚平易足君應爾遽瑗知非我所師
芥蒂胷中都掃盡兄酬弟勸復何疑

酬鳴陽苦熱韻

皇天分四時夏也獨可畏北陸迎炎曦當午勢逾熾哀
年苦侵凌袒跣時露臂絺幘可屋張竹床聊假寐溽暑
亦多情不飲乃似醉黃昏稍露坐喑暗蚊莫避緬懷東
岡翁本自彊人意翛然松竹林清涼異人世錦籜許栽
冠惠我有新制廣廈幾時成幘蒙賴餘芘

喜玄敬少卿致仕

似我歸來亦未遲
夫君得謝又先之
清朝況是懸高位
白社多緣赴夙期
到處谿山同載酒
故園風物儘裁詩
一場好夢今朝覺
却任傍人道是癡



震澤集卷六



總校官庶吉士臣張能照

校對官庶吉士臣陳崇本

謄錄監生臣王詔

謄錄監生臣楊邦彥

欽定四庫全書薈要

集部

震澤集卷八



詳校官候補通政司經歷臣郭祚職

欽定四庫全書薈要卷一萬六千八百二十三集部

震澤集卷七

明 王鏊 撰

追思慈愛堂為武定侯郭勛賦

蒼梧雲黯燕雲濕北望燕山空掩泣江湖漠漠山重重
高堂人遠何嗟及憶昔前人佐真主金戈百戰開節土
山河帶礪誓始終奸蠹潛萌中齟齬牀前學語藐諸孤

抱向閭闔聞呱呱天門九重不可問十年泣血紛漣如
飲冰嚙蘖老益堅中宵抱恨常悁悁金石可移心不改
茹苦銜哀重額天精誠動天天為顧茆土還加舊名數
金書鐵卷古元勳橐兜戟纛新開府聖恩重處慈恩深
玉帶腰懸自循撫古云死易立孤難程嬰杵臼猶摧殘
誰知女婦伸大義坐令荀息生厚顏昊天有極恩罔極
迴望燕雲長太息

四月九日與弟秉之進之過通安橋顧氏因偕立

敬登陽山絕頂次日過虎山橋七寶泉至靈巖山
而還得詩三首

陽山高哉幾千丈箭缺遙瞻在天上
一朝置我箭缺傍坐覺諸山皆退讓
太湖汀溼平於杯夫椒包山近相向
山腰鳥道何盤盤十步九折行且歎
昌黎正逢衡嶽霽太白休歌蜀道難
夫差悔悟苦不早公孫白骨纏荒草
子胥伯嚭兩立墟天地茫茫人易老
劃然長嘯來悲風一杯敬酌浮丘公
何時借我綠玉杖從此拄過扶桑東

詩成西日下山去回視山椒但煙霧

虎山橋

湖上仙山翠巘重畫闌面面對芙蓉人家斜日東西崦
野寺浮嵐遠近鐘我欲濯纓來此處誰能築室傍前峰
放舟又過溪橋去恐有桃源惜未逢

七寶泉

嵌巖滴玲瓏七寶梵完月幽亭泉上頭暗道曲通穴剖
竹走長蛇晝夜鳴滴滴煎無三昧手渴有七盃啜寒能

醒心神澄可鑒毛髮桑苧行不到品第誰為別埋沒向
空山側此行道暘

和林都憲見素侍用見寄之韻三首

止足平生不願餘肯將道義負心初詩傳元白郵應困
門引鄒枚席尚虛甲第又承三世學皂囊曾草萬言書
交游海內知多少尺牘何人問隱居

俯仰乾坤思有餘民風漸降已非初東都氣節真堪重
西晉風流好是虛慷慨有懷公攬轡殘生無用我耽書

七閩風月誰收管多在雲庄一晦居

夔虵誰允復誰餘門掩青山過雨初獨樹春歸花意鬧
九天雲盡月輪虛懷人不見願空拄得句無言手自書
寂寂荒村斷來屨洞天真作野人居

八月四日送子延喆北上八日至鎮江游甘露寺
看狼石泛舟登焦山至絕頂順風揚帆直抵金山
壯哉游乎得詩四首

甘露寺

頗憶登臨勝，擎舟復此過。羸劉傷斷壠，

北固山後秦始皇謂有王氣壘

斷之至今殘岡斷壠庭有二鐵鎖甚巨刻云梁天監中鑄

梁刻認餘波，海霧晴噓蜃。

江風夜吼鼉，孫劉何處問。狼石臥荒坡。

焦山

還將雙鬢白來者，一峯青江海。交流處，乾坤着此亭山。
形雄虎勢，雨氣挾龍腥。尚記燒丹井，難尋瘞鶴銘。

金山

快得天風使，輕帆破浪花。江山曾有約人，世亦無涯岬。

壓潛鼉窟潮侵落鴈沙
未須留玉帶且欲訪靈槎

鶴林寺

鶴林自是前朝寺落日荒郊有一僧
安得道人殷七七
杜鵑花侶舊時能

懷泉

泉之流兮湯湯我之懷矣與泉偕逝而無忘泉之鳴兮
泠泠我之懷矣與泉偕滴而無聲山下出泉兮于彼幽
谷我種我橘兮于山之麓泉橘相依兮其陰日繁以沃

橘之香兮泉之冽病者飲之兮浣彼肝肺泉之甘兮橘
之香病者飲之兮盪彼胃腸疫癘消亡兮神明內融濟
人利物兮前人之功吾雖不及前之人兮心與前人之
心同願橘香兮不絕泉兮不竭我心亦然永與茲泉
終古而不歇

野航

野航誰謂小恰受野人身載我欲何向五湖煙水濱

庭前牡丹盛開

一年花事垂垂盡忽見庭前錦繡層粉臉薄侵紅玉暈
芳心斜倒紫檀枝春雲不動陰常覆曉露微霑媚轉增
造化無私還有意石闌干畔幾迴凭

送蕭九成

聞道為關日舟船正好行依然經賦足頗覺筭緡輕牢
落江湖寢遲迴故舊情致身霄漢上林下望昇平

八仙獻壽圖

今日何日春晝長祥雲五色如蓋幢玄元儼在雲中央

羣仙雜選進壽觴鳳麟為脯瓊為漿彈八琅璈舞霓裳
玄元既醉悅且康授以長生不老之藥方我公之壽三
千霜

飛仙圖

若有人兮來自天雲為冠帔星為鈿九霞袂帶霓輜軒
幡幢繚繞笙簫聞雙成擁後飛瓊前綽約侶是瑤池仙
玉山之南半山主主人已去有賢姥冰霜之操節馱苦
精誠動天天應許有桃如斗棗如瓜紛天仙兮以媵女

九還七返仙家丹坐令白髮回朱顏賢姥之壽齊南山
得孫喜而有作

七十年來孫始見啼聲一聽便開眉家藏萬卷真堪托
庭植三槐夙所期膝上久擿文若坐目前先慰右軍思
三朝袍笏吾無用付汝他年佐盛時

廣成子壽圖

青山重重白石齒齒長松陰陰濯濯清泚中有至人綠
髮方瞳侶廣成子降于崆峒羣仙何來蓬萊之島酌彼

瓊漿後天難老願分餘瀝及此下民吳門之隱僖敏之
孫七十年間陰功在人翱翔藝苑及今白首何以祝之
岡陵山阜

韓文公勛書圖

墟落新涼對勛書士龍臨此意何如江南亦有韓熙載
到處人傳夜讌圖

贈況山人

姑蘇入國朝守也誰第一况侯江右來經緯氣鬱碑雍

頑境界清減稅嫠嫠殖所以吳下人至今感至骨空山
掩關卧有士叩蓬華云是况家孫兼邃青鳥術洞庭白
沙間為我卜窀穸茫茫彼雲山莫此云最吉侯政自堪
思生意尤歎密胡能終偃蹇命車還一出我生本悠悠
世事仍咄咄生前且莫料身後誰能詰青松白石間與
子坐終日勿言身後事且盡杯中物

覽黃省曾明水集

勉之生也少所負良崎嶇雖從諸生游而懷物外心賦

詩何所師泠泠秋磻琴鍾生去我久誰復賞此音不見
昭代士麗藻映詞林元間與大呂一鳴喙皆瘖青紫俯
首拾為國希世琛

東岡隱士築亭於松竹之間名曰款相意以為予
予不敢當而有也為易曰來賢八月二十四日初
會亭上口占一律

竹間新築小亭低草色花香醉不迷安樂窩中人略似
逍遙公後世誰齊莫因徐孺懸陳榻時許王猷過剡溪

願得時和邊燧息賦詩携酒日同躋

八月十五夜再得孫復次前韻

一歲中間孫再見馬家誰數白為眉冰輪滿正中秋夜
光嶽完當丙子期書卷家傳吾欲付麒麟抱送寢堪思
從今好學汾陽領尚見箕裘克紹時

送吳文之會試

湖上輕帆曠去颺燕雲漠漠快鴻毛洛陽賈誼年猶少
蜀郡揚雄賦最高歷塊始知千里駿當場誰是九方臯

洞庭自昔鍾靈秀不用夷亭俟海濤

次韻東岡十詠

五畷幽棲地謀生不願餘門淹戶牖轍架秩鄴侯書富
貴憑蕉鹿文章辨魯魚尚餘驕客在且欲倩君鉏
洞天連福地閉戶養吾真世降民風古春歸景象新雞
豚同作社魚鳥自相親借問誰相侶羲皇以上人
蒼雪餘千挺清風幾百竿葡萄羞晚酌苜蓿媚春盤理
亂誰能係升沈已厭觀鹿門真得筭猷遺子孫安

階穿新迸笋屋破甃牽蘿欄養能言鴨池馴博字鷺處
喧長得靜取足不求多獸對青山飲時時一浩歌

誰謂市廛遠時新薦亦嘉庾郎春末韭陸叟雨前茶架
護新秧橘瓶翻自灌花山人殊未識道是魯東家

先民遺訓在種德莫如滋盧橘接成樹楊梅低壓枝壽
應能比櫟智豈不如葵沮溺耕相耦都忘抱甕疲

未能齊出處猶幸得齊年郭泰舟同載陳蕃榻借眠溪
山朝上日墟落晚生烟村徑相過近詩成幾百篇

刺得幽居趣懸車却悔遲欵山低作檻畎水曲通池步
月相携處觀雲歎坐時悠然沂上樂點後少人知
黃閣歸來日伊誰共歲年巷中顏氏樂谷口子真賢小
閣調鸚語閒窓對鶴眠平生出處意把酒問青天
耕桑時有暇風物亦登臨自是逃虛子誰同擊壤吟簡
編中對古冠服外隨今一勺源頭水泠然洗我心

杏林

陸家園裏千株杏處處花開不待春種樹由來還種德

枝頭顆顆揔含仁

三月三日庭前白牡丹一枝獨開

紅紫休誇錦作堆
瑤華一朵占先開
侶從姑射山頭見
不減唐昌觀裏栽
綽約每憐天與態
瓏璵應藉雪為胎
風情一種無由見
携酒誰當月下來

董諭德文玉歸省其父太守德初詩以寄之德初
余同年進士也

瓊林三百英雄輩
海北天南復幾人
獸喜長庚陪曉月

更誇威鳳應昌辰
詞垣正印斯文遠
曲水浮觴櫻事新
萬木青松何足羨
與君同閱八千椿

東之齒落有詩具羨予齒之牢和具韻以慰之且
自慰云耳

兄弟一氣耳誰強誰歎哀
弟齒齧更落予髮白且從朝
來覽明鏡鬢鬢亂如茨
咄哉此二疾自古誰能醫
太公口含兩張蒼一無之年
昏過百歲天豈云獨私
人生真大夢世事如奕棋
社櫟散乃壽自全本支離
兄弟幸在

告為樂當今茲湖山共追逐杖藜未須支頭童與齒豁
韓公浪云悲西山朝氣爽不妨拄空願

姪延學作亭湖上甚壯詩以贈之

幾醉池亭雪色醪近聞亭子勢尤高白鷗不避新翻曲
黃鳥時窺舊賜袍波影半簾雲滉漾山形四面畫周遭
我來壁上題詩句禿盡中山顧兔毫

端陽風雨有作

風風雨雨過端陽畫扇朱絲邈建章佳節久懽連日醉

故山空負一春忙
胸中漫貯匡時畧
肘後新傳卻老方
聞道湖州園未解
坐令胥口作瞿塘

讀擊壤集效其體

林下老人何所求
求非拜相非封侯
所求海內民生遂
所願朝廷聖德修
工繇人人崇禮讓
羗夷永永罷戈矛
熙然萬載雍熙治
林下老人何所求

二氣陰陽相盪摩
不知真宰意云何
三王二帝時節少
五季六朝喪亂多
倉琅又見歌赤燕
翠釜還聞羞紫駝

近事天高何處問牛女今霄方渡河

我愛東岡一老人百年長作太平民無憂無喜亦無媿
有酒有詩兼有賓接樹灌花為活計游山玩水揔天真
我生亦是悠悠者願得東西永作隣

水仙花為張某作

貌姑射之神人携漢濱之二女儼仙袂之飄飄涉滄波
而齊步悵交甫以莫從攀桂枝兮延佇

丁丑八月二十日與弟姪輩泛太湖將遊石蛇山

舟發微雨既而雨大作抵消夏灣蔡九達舍宿明
日雨又作游興索然乘便風而還至家則日出皎
然矣為之一笑賦詩紀之

載酒張帆信所如青山含雨轉模糊虵丘咫尺翻成遠
夏渚消搖可作疎世事無端還自笑秋陰有象若為圖
始知白傅真堪羨五宿澄波皓月湖

庭梧七首

庭梧曾手植忽已逼蒼穹清夜長聞雨晴朝慣惹風旌

幢驚對峙琴瑟訝中空鳳鳥何年至吾生尚爾逢

春朝起常遲欲覺還偃仰隔牕幽鳥聲日照梧桐上

暑夜卧常遲搖搖動輕箑仰嘯取天風風在梧桐葉

秋夜忽已涼風葉何蕭騷露坐不知久月挂梧桐梢

長夜夢初回月上山之厓何由知月上梧桐影橫斜

長夜夢初回雨來山之北何由知雨來梧桐聲淅瀝

冬夜不成眠寒燈聽騷屑天明驚皚皚梧桐枝上雪

和東之送菊菊有楊妃西施之號

先春罨土槿編籬同對年來亦好奇自笑老夫心力懶
黃華隨意着高枝

爛醉都忘倒接羅高堂四菊十分奇西施未醒楊妃醉
白髮樽前恐未宜

年來黃菊也隨時闌出金盤與玉卮獨有歲寒心尚在
落英重作楚人詞

瑞柑詩

有序

洞庭柑橘名天下弘治正德之交江東頻歲大寒其

樹盡槁民間復種又槁包貢則市諸江西福建謂柑
橘自此絕矣予圃漫栽數株丁丑秋樹有五十餘顆
皆环柑也其餘纔盈二尺許亦結五十餘顆山人爭
謂之瑞喜而賦之

洞庭千樹綠化逐鶴林仙寂寞荒園裏纍垂寶顆駢揚
州傷錫貢合浦詫珠還瑞應憑誰紀靈根自此傳

素履詩

考祥元視履厥初慎無咎紛華非所忻貞靖自吾守遂

止諒不能欲進夫豈苟黼黻煥彰施白賁乃其舊

東菑詩

君豈東菑人而事東菑役帶經和雨鋤抱硯臨溪滌非
菑安有畬不耕固無獲他年看秋成千鍾豈謀食

西湖

我愛西湖好何時此一行六橋明月夜花底畫船橫

丁丑十一月得宣府報

土木垂殷鑒俄傳北狩音淚纏寰宇痛坐厭法宮深洛

汭歌釣石祁招度式金誰扶鰲極正持慰杞人心

再次曹定菴憲副見寄之韻

九十未及八十餘惓惓憂國心如初臨池草聖水通墨
隱几心齋室自虛海內浪傳平子賦濟南誰授伏生書
煩公重有東山望懶性今從水竹居

丁丑季冬二十三日過永定邵氏舟次荆溪和杜
子美客夜韻時杜允勝陳宗讓同行

荆溪舟獨進兩岸雪山明風破孤帆力水剗壞檝聲山

陰懷舊侶洛下詠諸生漸覺銅棺近悽然傷我情

夜泊方橋

天暝去程遠扁舟宿鴈沙風烟漁浦樹汀水野人家不
識剡溪路空懷博望槎鄰邦猶蹇澁况欲走天涯

河橋舟發歸途作

伐鼓侵星發吳門此日還斷漸溪漲闊融雪隴痕斑劍
井來寒樹銅棺失暮山哀年仍事役翻羨白鷗閒

宿毘陵驛

孤舟城下宿城漏滴寒更往事無人問幽懷忽自驚春
星垂野動村火隔江明北鴈無來耗蓬牕夢不成

黃勉之明水草堂

虎阜峭奔入天平秀特分軒牕通映水几席欲生雲讀
易已忘易攻文不倚文閉門方習靜非是故離羣

送李尹經述職之京

吳下徵輸歲轉多瘡痍方仗使君摩銓曹又上三年最
里下曾聞五袴歌茂苑雪消鳧鳥遠彤庭日永豸冠莪

春風十里楓橋路
挽鄧無由奈爾何

苔石幽篁圖

湖嵌一卷多瀟碧
數竿足愛此亦何為正也
受命獸

偶成

生世七十年迴看如一日
中間事萬變或喜或憂戚
得失與升沉其事固非一
杳然如寤中無復留彷彿
前者既已爾後來亦當必
所貴寸心虛翛然不留物
俯仰天地間無媿亦無慄

東之六十初度

昔我與子兮弟南兄北看雲望月兮思其有極每懷一
晤語兮路遠而不得茲余乞告來歸兮子亦辭此郡章
大衾與長枕兮日夕聚此一堂胡為乎限一衣帶之水
兮欲濟而無梁一年不十會兮悵中心以皇皇喜獻歲
之發春兮將上元節鬧花燈高烧兮絃管噉噪嗟耳順
之華年兮亦人生之難到子春秋遑遑以日高余豈能
乎無眊羗世上之浮名兮曾不可以與謀彼器溢而餗

覆兮樂曾不免乎憂謀人國而不善兮寧顛蹶之憊尤
進陽阿之妙舞兮發南國之新謳歌舞佯佯而迭進兮
曾不知歲月之邁年年歲歲樂復樂兮與子同壽乎千
秋

雙湖詩為僉憲謝廷柱作

峩峩靈峯嶺蒼茫寓國山兩湖分映東西間兩湖相去
無十里龜龍天池相對起朝游長林暮小江蕩舟欲行
行且止君非渭川叟公侯封已晚又非鴟夷子烟波去

不返要知釣徒非釣徒勅賜散仙在江湖

偶成三首

飯飽亦何事繞池看魚行
凭闌秋雨歇倚杖暮山橫
忽吾將老紛紛物自營
百年天地內事業竟何成

睡起亦何事支筇獸看山
浮雲世事改白日此心閒
鼎歲華晚提提倦鳥還
雖居人世內人世了無關

黃閣三台輔青山一病翁
伊周曾有志房杜本無功
閱世人頻異謀生室屢空
行藏那可問雲外送飛鴻

題四皓圖

蒲輪應召出商顏
漢嗣瀕危即日安
若使四翁終羽翼
肯教雌雉變皇鸞

謝安圍碁圖

朝野皇皇意獸聞
依然草樹八公山
誰知秦晉興亡事
祇在先生一着間

東之惠中製甚竒
侶東坡而小異
老夫之所宜戴
也賦謝之

幞頭窄帽尖纖雅俗無如此樣兼塾侶林宗微展角
高如蘇子不為簷將籠白髮真相稱若對青蛾未免嫌
我是越人猶愛着肯教漉酒似陶潛

四月八日飲陸長卿園亭

連峯忽地起嶙峋倒影亭臺漾碧湍寶障傍人雲錦暖
玉甃留客蔗漿寒梅酸正入調羹用花好還宜秉燭看
魚鳥浮沉滿池上我來終日倚闌干

三月望日飲張延德園亭

高柳陰陰影入池
落花飛絮蕩遊絲
輕風送酒催雙槳
活火煎茶試一旗
卻教詩書傳有種
習家亭館醉無期
獸憐漆室何為者
北望長吟有所思

延喆使歸自福建得衢州錦川石立於庭前戲作
錦川束錦化為石道遠懸知不易來千歲僵松鱗駁落
一株寒玉骨崔嵬庭除有地煩相伴梁柱無能莫見猜
賴是前人清節在鎮船元藉鬱林材

玉林

藍田曾種玉歲久長琅玕琪樹東西映瓊枝遠近攢每
羞何氏獻聊試傭生食况復人如玉兼葭欲倚難

東湖書院為吳獻臣都憲賦

獻臣先家湖湘有東湖後徙廣西亦作東

湖書院不
忘先也

東湖烟水空復空乃在武昌之西嘉魚之東氣吞長江
捲七澤聞有至人昔年隱居漁釣於其中邇來一百四
十載九疑聯綿竟誰在豈知蒼梧萬里雲山中亦有東
湖儼相待潯江灘江左右流落霞孤鶩長悠悠聞來竭

登大雲巔霜露鬱鬱愁松楸主人自是身許國到此誰
能忘首丘此亦一東湖彼亦一東湖乾坤萬里雲飛孤
願君慷慨終許國致君堯舜始作范蠡扁舟圖

虎丘

誰云虎丘小我覺虎丘大嘗疑海上峯湧起自天外忽
墜平野中萬劫翠不壞夫差昔霸王猛氣亦已汰神斧
鑿巉巖洞勺銀河派雙崖削未平呀呷勢將嘖靈湫湛
寒碧劍氣溢光怪銀海鴈飛沉冰巖松倒挂前朝百戰

爭今為梵王界吳儂得游觀時節紛綵縈我老猶愛山
興至時獨邁聿登浮屠顛坐覺三吳隘雲夢如可吞八
九無蒂芥千人石上眠把酒向天酌不知開闢來曾見
幾興敗天風忽然生萬竅同一噫滿山松竹吟波浪恣
砵泮平生磊塊習至此殊一快升沉世上名瑣屑真癩
疥我生本優游幸脫軒冕械甘為愚公愚不受蔡叔蔡
願言從樂天一年十二屆

送李端彝端行昆仲還嘉魚

二子故評事承芳之
姪自楚至吳來為其

父乞

墓銘

二李高風挽不回
巫山衡嶽漫崔嵬
憑將一掬懷人淚
灑向黃公舊釣臺

自楚來吳幾千里
五湖風月得同遊
片帆明日人何處
悵望長江日夜流

烏林有鳥不歸巢
聞有攬天赤壁高
我欲因之訪遺跡
側身南望首頻搔

武昌西去是嘉魚
縱有魚來不寄書
林屋天高無去鴈

他年何處問何如

野人獻菊碧色每叢作雙鳥並立名鴛鴦菊為之

賦詩

開與黃花不並時
翛然天與碧鮮姿
多應幼玉同韓重
化作人間連理枝

枝頭兩兩立東西
知是鴛鴦不獨棲
一種貞心誰得侶
廬江小吏仲卿妻

不向東籬嗅落英
相呼相喚本同聲
不知草木緣何事

也作人間兒女情

再至天王寺有感

深鎖禪扉暫一開
竹間那復舊池臺
歲寒只有庭前栢
五十年前見我來

舊日沙彌今老禪
白頭我亦異當年
見恒河性依然在
莫為浮生一惘然

慰東岡失子

生子秀而文
燦然瓊樹枝
豈獸立門戶
且欲承裘箕一

朝忽摧折天也真難期縱使鐵石腸誰能不哀斯哀之
倘可生哀也理亦宜號天天不聞扣地不知肝腸為
爾裂齒髮為爾哀死者竟不返生者空自隳兩傷復何
益不悟真成癡我有一藥方授之竺乾師能治迷罔疾
願君試服之茫茫大化中萬物皆寄而賢愚與貴賤趨
死同一歧雖有壽與夭同盡無等哀彭聃安在哉孔孟
亦若茲况區區所立畢竟何足施譬如空中華妄作喜
與悲倏然還變滅豈足仍追惟所以東門吳無兒如有

兒衆生纏愛賊有如雀黏繭卓哉古達人棄去如唾涕
愛河苟不乾苦海終無涯天道有翻覆人事多參差自
古每如此吁嗟奈何其顏淵仁且夭不聞路也嬴子夏
泣喪明但為後人唾追亡建負鼓嗟哉空爾為勸君急
返棹收淚舉一卮

挽施仁德

東岡子

又是山陽聽笛時狀元門第舊弓箕鳳池乍長丹山羽
瑤圃俄摧玉樹枝載酒常時過問字趨庭此日罷聞詩

悠悠真宰知何意誰與乘槎一問之

己卯開歲連雪有作

江南開歲逢三白陰乍晴時晴復陰竹葉得風狂作勢
梅花和月冷難禁漁叟未愛江頭好龍馭惟憂塞上深
我是袁安方閉戶地爐火暖獸愁吟

是歲年
依民飢

戲題羊皮燈

剗腸何罪有誰憐化作光明照綺筵百里粥從春市裏
五星明聚夜堂前兔輪避滿哉生魄魚枕潛輝宿解懸

只恐左慈工幻化故來東壁弄清妍

已卯開歲九日第鏐宅觀燈次秉之韻

燦燦紅蓮映綠池看燈又是去年時銀毬雪色懸珠箔
畫帶波文綰鐵絲閃鑠最宜初月映颺颺無藉好風吹
因思二十年前會鳳閣傳宣趣進詞

詠魚枕燈

火樹千枝摠不如瑩然光彩透冰壺共言魚枕春裁玉
忽訝龍涎夜吐珠雲母屏開雲影動水晶簾展水紋鋪

香羅萬眼誇吳市瑣細空勞詠石湖

萬眼燈以碎羅紅
白砌成工夫妙天

下見石湖集

詠吳下節物

朱半山輓詞

晚從秦晉結葭莩紹也他年可不孤回首玉山人去遠
夷亭斜日雨踈踈

幾回折簡荷招要八月西風看弄潮今日稽山無賀老
畫船空指半山橋

次邵侍郎國賢見壽之韻

杖藜曉上清風閣北望雲山渺雲壑懷公不見誦公詩
清廟朱絃為誰作晨星落落今數公平生出處將無同
我生與世早多忤乞身歸卧湖山中伴來遠致兩罌水
風致年來那有此品題未擬桑苧翁煎法曾傳玉川子
力田自好任逢年隴雲寄我山中篇漢庭共詫大人賦
那知山澤非臞仙與公周旋亦云久不飲每酣公瑾酒
子牟魏闕本江湖公也那能忘黔首我心古井終不波
杞人之憂憂豈過緘詩遠寄惠山下問公究竟其如何

三月二十三日賞牡丹東之不至有詩來次其韻
老去那能復種花姚黃魏紫亦誠嘉豈知洛下平章宅
還到吳中楚老家粉豔紛披晴墮雪紅香繚繞晚生霞
揚州芍藥何如此空色於人豈有涯

次林見素中丞見寄之韻

山林滋味老尤長肯羨裴家碎錦坊却羨雲莊千顆玉
炎風五月擘紅香

酒熟無人可共嘗老年唯以醉為鄉那能命駕輕千里

重作歐公會老堂

閏中秋觀月仍兩度生辰喜而有作

一年最好中秋月豈謂今年兩見之玉宇洗空如有待
冰輪出海本無期堯階影展新蓂葉蟾窟光添古桂枝
舉酒向天還酹月年年初度得如斯

木石居士為葉文節賦

山頭一片石石畔幾株樹下有幽居人結廬與同住木
石不解語亦復何所知相看兩不厭終歲還自怡石吾

甚愛之千古無緇磷木有歲寒心冰霜見蒼潤二物豈
吾徒對之德堪進方今構明堂傍求柱礎材夫君久居
此乃獨胡為哉

閏八月中秋夕再至靈巖

靈巖高處尚堪梯佳節重來路不迷日落湖山天遠近
雲移臺殿月東西千年杜宇還悲蜀一舸鴟夷竟去齊
往事淒涼那可問懸崖荒蘚沒前題

重改靈巖玩月詩

浮雲捲盡碧天高，坐見冰輪出海濤。
秋色十分當此夜，風光千古屬吾曹。
瑤樓不鑰身親到，香徑無人首獨搔。
天柱峰頭那侶此，莫嫌醉墨浣宮袍。

憫松

翠峰洞庭古刹也，自寺門至官道皆雙松夾峙，大可數圍如葆蓋如虬龍，每風動聲聞數里。蓋宋元故物也。予甚愛焉。每至輒坐其下，移日。今年夏至則無復了遺，予甚愕焉。召其僧，尤之。僧曰：縣官征徭急身之

不存松於何有蓋粥之以充淫費也吾聞釋氏為出世法謂世網不能加也徭且不免焉非獨人之加而翦伐及於茲松千年故物且不能逃於乎苛政之害如是哉是歲正德十五年也

洞庭古寺名翠峰山門夾道皆長松蒼皮鱗皴根詰屈風動十里聞笙鏞團栞下蔭翠羽葆夭矯上聳蒼髯龍不知當年誰手植云是宋家三百年前之舊物每當赤日坐其下時有清風吹鬢髮因思古人不可見重是甘

棠無翦伐茲來忽見怪且驚倒卧道路縱復橫可憐堂
堂十八公盡與官家充踐更神叱鬼雄競遮護嵯摧壑
陷難支撐我傷嘉樹因久立封殖有懷何所及顛僵力
與風雷爭昏暗如聞龍象泣龍象泣何所為縣官催租
如火急伊昔秦皇法最苛猶有封爵來山阿如何今日
值劫數大斧長鋸交搗呵深山更深無處避豈若杜櫟
長婆娑年來征稅摠類此誰采野老民風歌

七月三日大風

去年七月颶風作駕海驅山勢何惡
沿江濱海萬人家
一半漂流餒蛟鱷今年七月仍颶風
驅山駕海勢畧同
人家有備幸多免禾偃木拔歲則凶
我聞有道唐虞世
風不鳴條雨露塊休徵五事來應時
百穀用成民用乂
當今公道如天開金滕既啓羣公來
賓賢養老天子聖
風伯爾獨胡為哉

送顏檝檝同年水部澄之之子也

當年同看杏園花聚散升沉事可嗟
之子此來知有意

年家情分是通家

前人遺墨尚縱橫
落落詩篇更老成
此去好逞醫國手
官家藥籠要復苓

次石田松石圖

長松落落白石鑿
鑿根株聯蜷皮駁
犖懸厓倒挂蛟龍
僵干雲直上雷風
作仲圭死石田生
後先意匠同經營
想拈秃筆快一掃
勢與碣石爭崢嶸
堂堂十八公冰霜
閱雄俊巍巍石丈
人不緇亦不磷
兩翁抱奇節
結交亦

相近我非米南宮每見思拜之我非陶隱居聽此心自
怡方今大厦連雲起柱礎明堂獨須此紛紛匠石正求
材胡為棄置深山裏胡為棄置深山裏

題任月山飲餉圖

韓生畫馬不畫骨月山七馬何崢嶸世俗紛紛方舉肥
誰收翼北空羣物連錢鑿蹄黃金羈圉人飲餉勤莫辭
一朝拂拭橫門道逐電追風君始知

米南宮茗溪春晚圖

春雲黯黯雨模糊
草樹熹微半有無
夢入茗溪天欲曉
不知元是米家圖

杜允勝偕陸子潛兄弟携酒至園亭

尋山何用過城西
屋後巉巖且共躋
高柳暖風初罷絮
曲闌疎雨不成泥
洛中雅自推三嘏
王所端寧止一齊
獨樂有園今共樂
不妨詩酒日相携

諸友飲怡老園分韻得春字

題詩昨日送殘春
桃李陰陰入夏新
風動漸驚紅落莫

雨餘猶愛碧嶙峋敢期事業同夔高且可壺觴引白中
獨有江湖憂未歇北來消息苦難真

震澤集卷七

欽定四庫全書薈要卷一萬六千八百二十四

集部

震澤集卷八

明 王鏊 撰

詩

至樂樓詩為大學士費公賦

橫林特地起高樓樓上書多擬鄴侯日與聖賢相對語
身於天地復何求三峯有意當牕見一水無聲繞檻流
試問主人何所樂本來無樂亦無憂

重賦吊文丞相祠

漢朝冠蓋竟歸元窮海累臣抱獨寃請劍便須遊下地
結纓何處是中原青泥不化萇弘血白浪空歸伍相魂
斜日悲風柴市裏行人千古掩啼痕

盧侍御師邵來謁予於山中時酷暑與約為山寺
之游未明舟乃潛發有詩來次其韻

炎蒸一室困塵編坐憶山房滴暗泉古寺晨游聊復爾
清溪夜發豈其然一天涼雨懷逋客半壁殘燈對老禪

清旦坐謠還至夕空餘隴月向人圓

次韻施東岡喜雨

酷暑今年直破秋固應宋玉厭荷凋一朝雨勢翻天至
兩月炎威掠地收陋巷誰知顏氏樂清時空抱杞人憂
漳濱好在劉公幹何日青山爛漫游

費倫同七十少同硯席者也

少小相隨同隊魚年來白髮映鄉閭追思往事都如夢
閒看浮生好是虛某水某丘游釣處一觴一咏笑談餘

與君再結丹丘伴還見蟠桃結子初

次韻沈方伯良臣為余七十之壽沈與余同生庚
午又同在郡膠今同致仕

黃髮歸來共理田食貧終不羨逢年泮宮燈火憐相並
李邵科名媿獨先紅藥花翻分陝路白鷗沙占太湖邊
年來南極當吳分莫怪鄉人擬二仙

贈葉巡按忠

鄱陽漏網觸奔鯨南國烽烟徹夜明江上貔貅雄遠戍

浙西士女賴長城鑄山久訝吳王淟斷剝誰憐郭子橫
見說臺端峻風采草間狐兔不須驚

陸長卿為三山甚偉因賦

曾聞海上有三山飛墜君家苑園間乘興偶來觀縹帙
扶衰且欲上孱顏參差臺榭雲霞氣出沒巖巒虎豹斑
老我年來無長物舉杯相對亦忘還

延素藏李嵩畫因題其上

吾聞須彌之西興林國中有仙山人未識頻伽獻果龍

象參有女跣跣常面壁終年面壁何所翫山月松風為
我伴湛然大定本來空要證菩提登彼岸當年生長本
王宮錦袍錯落真珠紅生身在慾不染欲濁水秀出青
芙蓉姻親眷屬棄如土瑤樓玉宇皆苓通一朝棄喧思
習靜白雀叢林去修性至人有念天不違孽火雖狂中
自定鑊邪干將段段壞身縱淪亡性常在豈知千古屍
如林天遣重生在人界從今不涉生死關六通四智正
覺還摩尼珠露靈光發優鉢花開本性圓九重藥王須

眼手眼手於吾復何有乃知忍辱有仙人手眼不嗔隨
所取兩手去千手生兩眼亡千眼現世人不識驚皆眩
千葉金蓮繞坐生億丈豪光放皆徧吁嗟流浪閻浮人
慾海曾無解脫因李嵩妙跡傳千古稽首空悲蟣蝨臣
送王守會試

雙珠出南國光曜珊瑚枝一入天府選一嗟滄海遺連
城揔無價韞匱亦有時鴈行先後耳去去勿復疑

五色菊

嘉定童以遜用水
草接菊五色俱有

前身那復是江蘿
白白紅紅忽滿枝
恐是韓郎工幻化
賺教陶令醉東籬

年來黃菊也隨時
闕出金盤與玉卮
姑射惶惶西子醉
歲寒心在許誰知

松石齋

蒼松落落偃虬龍
片石谿斜聳碧峯
石倚松根添瘦漏
松穿石罅轉丰穠
歲寒永結三生契
茅土曾加萬戶封
聖代祇今須柱石
大山長谷可能容

送賀志同少參之官廣東

越王臺上柳毵毵使節行行五嶺南
多芥冰霜瞻舊吏
薇垣風月待新參
檳榔葉葉還隨俗
包匭菁莪好貢柑
自是隱之風節在石門泉水不名貪

瓦屋山歌

瓦屋山在雅州之滎經其地絕勝長洲
尹高君第聞之曰吾將老焉余悲其長往而不來也
以吳人之意招之

瓦屋山瓦屋山乃在邛崃九折平羗間上有攬天壁立
之孤峰下有奔流赴壑之驚湍神光夜現普賢相紫氣
晝滿玄元關娑羅花開錦繡斑蒙茅紫竹長琅玕誰云
風俗混髣蠻世塗險巖乃歎安武陵桃源在人間丹崖
萬丈誰能攀君今此去何當還長洲父老翹首日西望
願君少住慰我吳下之羈縲

白巖歌為喬希大司馬賦

白巖在太原之平樂南
京兵部尚書喬公希大

家焉吳門周臣寫
其圖余為題其上

太行西來勢如翔兩崖忽斷紛開張中間沃衍散耕牧
至今風俗餘陶唐白巖嵯嶢森立玉疑貯白雲千萬斛
又疑天山雪不消六月懸崖挂飛瀑長松砢磳偃虬龍
磐石坐送孤飛鴻朝看白巖橫暮看白巖縱幅巾芒屨
長松下白巖處處長相逢一朝還為蒼生起坐鎮留都
惟隱几江東烟樹晚重重回首白巖雲萬里苻堅入寇
不須驚隱然人倚如長城圍棋侶是謝安石斷荆誰為
郭子橫只將忠赤佐天子不管白壁來青蠅青蠅青蠅

金方口人卷八
何為哉我思白巖歸去來

和林見素次蘇子卿見寄之韻四首

向晚心不怡中庭立徘徊羣雅競鳴噪孤鴻獨無依無
依亦何恨稟氣與時乖物情逐時好志士多苦懷吐哉
賈太傅厝薪胡獨悲黃竹有遺歌至今令人哀籠鳥望
雲端自傷翅翎摧海濱有大老何時當來歸知音苟不
存至絃徒自揮悵望武夷雲我身安得飛

夜光忽暗投按劍知無因傾蓋苟如舊異世為同人昔

君向遠謫可贖人百身紛紛燕蝠輩相爭錯昏晨對面
不相見肥瘠越與秦所願崇明德皓首期日新物理有
相感波間躍麇賓嗟嗟皇甫規豈是中州人誰云閩吳
遠眄昧心所親

驅車遠行邁中道忽自疑章甫資之越無乃非其宜涼
颺撼庭柯締絡已淒其歸來洞庭野茹糗勿復辭椒蘭
亦已變根莠能無滋四時紛代謝彼此各一時獨卧茅
檐下無為浪多思

昔我游藝苑吸露漱奇芳及今志乃吞敢望作者堂一
編誰所授來自閩之鄉讀之增壯氣字挾風與霜忽然
造冲澹蘇李同翱翔借問何能爾上池飲奇方鳧鶴各
有分誰復計短長蒹葭望伊人宛見水中央秘之在篋
笥時時吐晶光

聞尚書泉山林公訃

俯仰天地間我生殊已晚古人不及見前輩亦漸遠昔
年忝朝列三五齊手板入參議帷幄出翱翔藝苑兩心

無猜疑終始共推輓豈知一朝異分散東西征羣才飛
刺天林立盈彤庭三五各天涯相映如晨星嗷喑時所
背空負海內名有如林泉公宿德衆尤向詞林三十年
緝密見涵養捺履冰玉清文章臺閣樣榮名勢利途衆
競獨退讓臯比坐成均六館無孟浪道傍推大宅寒士
俱挾纊保釐向南都百僚同倚仗平生事藏密臨事何
慨忼大奸弄朝權士氣紛沮喪羣蟻赴腥膻正色疏獨
抗浩然賦歸來高卧青山雲弘開綠野堂賓客引白巾

廣德車尚懸疏傳金不貧行年八十餘龍馬富精神人
言天所留復起承華勛方期會老堂杯酒道情素計音
忽然聞風前淚如注安得延陵劍挂向閩山樹

懷恃卷為歸仁賦

人皆有母而我獨無嗟我之生曾不如彼慈烏慈烏有
母能反哺我養不逮獨飲泣以躊躇人皆有子而母獨
亡嗟母之生曾不如彼空桑空桑有子能返顧母年不
待獨飲泣以彷徨

荆山小景為王維綱兵侍賦

小築雲巖寄此身
軒窗長對碧嶙峋
龜蒙鳧嶧連天起
祇與荆山作主人

觀福建內臣進花鳥賦

玄猿呈藝宛如人
孔雀鸕雛貌摠真
恠石鈇松曾入貢
名花異卉摠橫陳
藩方故事修應舊
聖主當陽德正新
一路光榮人莫羨
已聞千里罷還民

贈黃道士

海上仙槎去莫親青谿騎鶴更何人參同契得心傳妙
太乙爐存火候真白日山中號鬼魅黑雲壇上撥星辰
年來黃髮衰遲甚乞與明牕一縷塵

送高德元還越

解纜錢塘過五湖童蒙求為指迷途方池墨暈春波淨
別館書聲夜月孤十載交情如一日九師精義重三餘
願君莫作飄然計正講濂溪太極圖

寄韓尚書貫道

河東夫子近何如
北鴈聯翩不得書
一片丹心終許國
半生華髮只鰥居
尋盟莫放山陰棹
挾策誰從白下驢
我有愁懷何處寫
首陽雲盡月痕孤

奉和東岡歲暮有懷見寄之韻

歲暮相望思渺然
幾迴欲去更遲延
舟辭震澤無多日
歷改王春又一年
澗壑未須悲蒹葭
落閣門誰正候傳
宣
人生得喪應難定
社櫟無能却自全

次韻文徵明見贈之作

十年穩臥碧山阿，姓字無緣落諫坡。
江上野鳧元自佚，日邊威鳳況云多。
正逢聖理方更化，豈謂溫綸亦漫波。
幾度懷恩思自効，蹇疲難進欲如何。

和謝少傅晚步見寄之韻

疲繭懸知進步難，十年學道得鯢桓。
晉家謀國三為衆，蒙叟巢林一已安。
獸上高丘時縱眺，偶携稚子亦成懽。
願公早為蒼生起，林下還需聖澤寬。

憶東之

歲歲重陽送異葩
楊妃西子闕橫斜
今朝獨到東籬下
含淚無言對菊花

歲歲元宵興倍增
羊皮魚枕各分明
繚絲新出滇南樣
獨惜伊人見未曾

歲歲春山得共游
藍輿軋軋兩夷猶
如今不用登臨去
花落花開獨自愁

常時見月倍相思
海北天南會有期
今日舉杯還向月
不知何日是歸時

月下花前每舉觴分題押韻兩相當如今風物依然好
不見來書細作行

敗葦蕭蕭古岼頭垂楊兩岼送行舟夕陽衰草荒郊外
爭使行人不淚流

每到塘橋月色昏兩燈扶幼自應門如今怕向西州路
舟過楊林淚暗吞

久旱喜雨

五月炎熇熾若焚西來一夜雨翻盆欲知遠近懼多少

白滿陂塘綠滿村

唐子畏臨李成羣峰霽雪圖

吾聞西域之西雪山高六月積雪猶不消今之畫圖無
乃是何山勢洶湧如波濤大山崔嵬小山聳萬壑千
岩光欲動營丘化去五百年遺踪一見人皆竦六如胸
次蟠輪困戲梭碎玉散作千嶙峋一重一掩分向背營
丘侶是君前身隆樓傑閣爭相向美人正醉銷金帳豈
知洛陽城中僵卧者門外無人雪一丈

毛都憲七十邵二泉以前韻為寄復次之

紛紛才俊登臺閣誰伴幽人住巖壑龍驤萬斛橫巨川
商家欲濟須渠作當今人物有如公曾蟠經濟誰能同
世人重腊不重玉居然棄置中吳中臣門如市心如水
崇也當年亦如此平生意氣小楊修碌碌誰能數餘子
力田終不羨逢年熟讀參同內外篇七十年來髯侶漆
人言真是地行仙錢彭八百不為久壺中自製長生酒
金華玉液分劑停鶴髮飲之成黑首世途宦海足風波

鍾呂日久相經過黃芽白雪行已熟日月跳丸奈爾何
嘉靖元年二月廿九日與林司空見素同登上方
俯視雲水千頃青黃絢爛見素曰此一片錦也賦

詩紀之

晚扶殘醉上岵嶢雲水空明映碧寥雨歇花畦紅冉冉
春歸麥隴綠迢迢幾番游鹿還堪吊一去冥鴻不受招
遠客登臨思無限手摩蒼蘚認前朝

送毛百朋之北京應舉

幾年白下避車塵此去爭誇脫穎新
桂子已傳蟾府種杏花還醉曲江春
題名早覺先生里捧檄懸知喜為親
八月南來鴻雁使音書寄我莫嫌頻

送大行人柯君使畢還閩中省觀余竊伏草野無
復當世之望忽承九重遣使銜命下育立園此三
代養老引年之盛禮也斯禮也不見於天下久矣
顧余何人而際其盛君使既竣使道歸拜太夫人
于堂感激之餘無以為報因賦詩贈之

天王出震萬方新
草莽還能念老臣
誥錫紫泥銜鳳嘴
服裁文綺損鮫鱗
未嫌五馬歸朝趣
且喜雙魚入饌頻
哀病自憐無補報
寸忠還仗達楓宸

林見素自吳過二泉二泉有作次其韻

旛旒翩翩動復延
幾迴翹首太湖天
一生面會知何日
千里神交積有年
載酒未過揚子宅
抱衾同上鄂君船
知音自昔稱難遇
第二泉頭撥五絃

千尋礫砢慧巖松
歷盡冰霜有好容
二叟共談泉上石

孤帆三宿海邊峰，淵然叔度難為挹。老矣馮唐豈願逢，
盛世臯夔方並入。巢由自可遂疎慵。

傷庭梧

嘉靖改元七月廿五日颶風大作庭前雙梧其一忽
顛賦詩傷之

庭前兩梧桐，膚寸手所掇。歲月曾幾何，直上殊挺拔。我
我雙幡幢，雲漢相摩戛。謂言召南棠，百歲辭剪伐。獨嫌
清秋夜，障我中天月。星辰互蔽虧，曾次不得豁。意欲稍

去之惜此方
夢鬱颼風忽
西來勢倒滄
海竭屋瓦盡
飛揚行道多
顛蹶挺然與
風爭倔強蛟
龍跋終然不
自持劃若崩
山圻杜陵惜
楠樹我意亦
恍惚信哉昌
黎言木高風
必折勿言勢
崔嵬螻蟻中
潛穴侶聞崇
明沙濱江馬
陀窟萬室隨
江流老少多
漂沒公胡久
彷徨為此良
咄咄翻惜堂
構初不種松
與栢

金氏亭上賞菊昔曾於此看牡丹

牡丹亭上昔同看
又見黃花感歲關
西子韶華常帶醉

東籬晚節頗禁寒坡翁莫恨居無竹楚客空嘲澧有蘭
秋月春風興無限為君終日倚闌干

癸未春予送女至京口至之明日為上元節是夜
宴邃菴楊少傅第少傅懸燈于山燦爛奇甚

良辰勝事古難齊此夕鰲峰喜共躋遠岫流輝星上下
曲池倒影月東西臨風玉樹遙歎雪出水青蓮不染泥
鐵甕城高如白日歸途馬上聽晨雞

遊招隱等寺

春寒漠漠上宮袍
雨後山光湧翠濤
洞口雲埋龍尚蟄
壠頭泉迸虎曾跑
每因懷古還興歎
豈謂尋幽反得勞
明發丹陽重回首
長江天遠甕城高

茅山

大峰小峰連中峰
當天削出青芙蓉
一朝忽立九霄迥
百丈已度千巖重
思昔飈輪同駕鶴
祇今雲氣猶成龍
遙遙長史復何在
華陽洞裏應相逢

茅山巧石亭

大湖有奇峰倚插半天裏風雷忽失之何年飛墮此

孟子河孫氏樓

江上青山山上樓凭闌俯瞰大江流海門烟樹熹微見
云是三山與十洲

張旭春草帖子聞其奇久矣今年至京口始得觀
于少傅楊公之第天下奇蹟也公欲予題其後以
詩來云敝墨殘毫一尺餘老來猶得伴幽居宋元
好事題將徧當代名公可缺書余謝不敢當次其

詩云

種髮蕭蕭七十餘，問奇還過子雲居。
幾迴欲繼元和脚，阿買從來不解書。

禽言

吳中蠶熟時有鳥日夜鳴其聲云摘芭看火相傳昔
有婦摘芭棲蠶火發芭上焚死化為鳥余憫其志為
賦二首

摘芭看火摘芭看火星星早不滅
炎炎熾其那吳宮已

成灰阿房亦焦土摘筓看火

摘筓看火摘筓看火汝身不自全更管人間火李斯佐
秦亡林甫熾唐禍摘筓看火

次木齋閣老見寄之韻

行年七十又加三俯仰乾坤幸免慚世有錢鏗方我老
坐無鮑叔共誰談夕陽溪壑翠尤禱曉雨園林綠正覃
還擬西湖為勝集已標沽酒典朝衫

纔說迎春又送春紛紛紅紫幾番新誰云海內無知己

且喜尊中有聖人，瘦似維摩還示病。
樂如原憲不妨貧，山人自合山中老。
出處無煩問大鈞。

知樂亭

深巷逶迤接遠汀，小園花竹閉幽亭。
春池水漫魚遊樂，午院風微鶴夢醒。
有榻可能分我坐，無弦元不要人聽。
日長讀罷參同契，正對前山一點青。

六月苦熱壬子日得雨喜甚

幢幢淅淅又蕭蕭，兩月炎威一夕消。
酷侶甑山揚火熾。

快如銀漢瀉天瓢
垂龍久鬱蒼生望
淑氣潛回赤土焦
林下老人忘帝力
有年還聽路傍謠

送盛斯徵都憲巡撫江西

鴻都兵後望來蘇
江左來旬此大夫
入夜災星方退舍
詰朝甘雨又隨車
風較舊仰擎帷外
河潤新傳視篆初
文肅家聲真不負
尚能把筆為君書

題畫

杏花如雪滿長安
起視星河夜未闌
為惜穠華宛相侶

臨風先折一枝看

坐看冰輪碾玉池夜深欲去更遲遲
廣寒宮裏誰為伴特為姮娥住少時

和東岡憎蠅

炎宵擾擾困蚤蚤稍喜新涼奈爾蠅
每向杯盤傷沒溺故於眉睫惱曹騰
居然能變白為黑忽地翻令愛作憎
勸爾營營休自得西風昨夜報嚴凝

謝郭長洲惠橘

瑤梓紅玉寫纍纍四月江南見亦稀只訝蠹房輸與蜜
誰將猩血染為衣釘來客座驚三絕種向家園待十圍

他日洞庭修橘譜但應書作郭公緋

朱橘

誰從天竺到閩南移得祇園別樣柑灌頂醍醐雖少液
兜羅綿色尚餘甘一拳不減商顏趣十指分明佛手纖
歌利不須矜節解最無嗔恨是瞿曇

佛手柑

丹陽孫思和訪余于洞庭詩以送之

曾訪南徐孟子灣七峰高處恣躋攀何當再約孫明復

徧覽長江兩岸山

玉柱金庭未易尋
飽看七十二瑤峯
太湖多少閒風月
歸對金焦盡日吟

重陽前二日東岡人來約登高之處詩以報之
風風雨雨重陽近
肯向東籬漫舉杯
闕下每叨黃紙問
林間還喜白衣來
五湖烟月容兼管
百歲風光許獨陪
老眼欲舒何處好
與君携酒上崔嵬

東岡有只愁風雨
侶今朝之句走筆次韻答之

太湖高處望夫椒佳節登臨不憚遙折簡故人先有約
定知風雨不崇朝

九日登象鼻諸嶺

秋來日日風和雨猶喜重陽一日晴携酒登高高興發
徧摩石壁與題名

重陽後復雨速東岡

蕭蕭風雨送重陽索莫園林夜有霜咫尺故人期不至
黃花端復為誰香

和見素尚書得謝之韻二首

把袂楓橋憶去年旋聞廷論幾扶顛尚方甫聽尚書履
春水忙歸野渡船冠蓋使應傾洛社經筵不道少伊川
從今烏石岡頭獻付與希夷自在眠

雲補衣裳竹補亭亭中高卧一人醒匣涵溫室金泥紫
飯煮仙家玉粃青自信逆鱗無忌諱亦緣磨蝎有神靈
何當萬仞語溪石魯國顏公與刻銘

重陽後五日延陵奉菊為壽五色皆具而紫菊特

奇因賦

舊種寒花五色齊
年來紫菊出關西
楊妃醉醒暈猶在
順聖名高價盡低
點綴不煩丹竈汞
封培應藉武都泥
姚黃魏紫元相婉
說與詩家漫品題

金碧山水為丹陽孫思和賦

碧水丹山碎錦茸
樓臺疊疊樹重重
恍然坐我江南岼
相對君家七秀峰

胡太守孝思奉詔存問過太湖有作次其韻

東南巨浸茫無外吳越交爭向此中
漠漠鴈飛愁欲墮
冥冥帆遠若乘空樓臺倒影星河動
花木交陰島嶼通
倘沐皇恩分一曲他年請爵太湖公

林屋峰前受一廬渚鳧汀鷺住相連
久塵殿閣三台地
歸占東南一洞天詔下屢沾新雨露
林間還與舊雲烟
自從白傳來游後直到君侯兩侶仙

毛給事王高祖母劉曾祖母魏雙節詩

姑孀居婦孀居姑誓不負夫婦誓不負
姑艱危顛踣交

相扶兩心炯炯冰玉如寒燈照影相映孤牀頭遺息聲
呱呱煦濡抱負夜辟纊迄今有立非所圖山南崔家大
且都天道耿耿良不誣天道耿耿良不誣

胡太守再次前韻復答之

太湖三萬六千頃七十二峰烟雨中萬壑奔流秋野濶
孤松倒挂寒潭空恍疑靈境與凡隔豈謂人寰有路通
畫船五宿澄波裏千古風流始屬公

洞庭東西雙玉峙物外地脉相勾連雨後人畊隴上陌

月明犬吠洞中天紅蒸遠岫上朝日暝入孤村生暮烟
漁郎再到忽迷路錯比桃源道是仙

歲暮有懷木齋閣老因寄

東山謝傳近何如尚憶同游玉署初歲月閱人雙短髻
功名過眼一蘧廬剡舟有興空回棹塞鴈無緣得寄書
聞道西湖好風日幾迴命駕復躊躇

胡太守冬季存問謝之

退傳間居正穩眠忽聞優詔下林泉玄纁束帛皇恩重

駟馬旌旄太守虔三代引年聞有禮間身報國媿無緣
獨憐葵藿心猶在願得迴光徧海堧

復生

萬生擾擾咸歸盡盡處還延世盡驚揮環且非羊叔子
折矢乃若徐佐卿庭畔枯株有由斡雲間晦月哉生明
相知相見莫相訝昔時子政今更生

盧師召侍御新建范文穆祠於石湖傍有詩次其

韻

萬木陰森蔭畫梁
淳熙奎畫尚流光
一丘占盡吳山勝
二水分縈越壘長
枯坐老禪依竹影
時來估客薦蘋香
雪坡天境依稀在
莫把名園比洛陽

重遊一雲寺

一雲在天平之西
余弘治間曾一至
焉留詩而去
正德辛巳復至其地
俯仰二十餘年矣
感歎之餘漫賦
一絕

為愛禪方好竹林
不辭迢遞度遙岑
山僧認得曾來客

祇是鬢鬢，滿簪。

游宮窿山

與蠟柯輩泛舟至胥口潘氏日已西遂宿明日雨將
午少霽至宮窿寺寺在山腰飲法雨亭而還不能窮
絕頂之勝也

十年林下無羈絆吳山飽探翫宮窿至近高且險
欲至靡由輒興歎喜聞地主有嘉招春服初成雜童冠
畫船載酒出胥口畧綽湖稍旋抵岸民淳地僻客至稀

老少相扶出門看吳王種香涇尚存歲歲采香多女伴
我聞且欲登香山雨脚忽來行渙散明朝雨勢止復作
世路陰晴那可算文侯豈失虞人期勇往前行賴明斷
籃輿旋濘那復辭遷迤青山開四畔前山雲接後山雲
侶是山靈顯竒觀嶽崎犖确路登登山腹盤迴轉危棧
諸峰一望皆下風始信陽山纔抵半買臣駁落讀書臺
曾是樵夫終佐漢丈夫出處會有時不記當年愚婦訕
清泉一脉甘且寒肝肺塵埃得前浣山頭咫尺不得升

甘被同行譏老悞茲行雖勝興未厭斜日歸途幾留盼
回頭一笑謝地主他日重來殊未晏

和邵二泉申詔許終養韻

青門幸有種瓜田出處無煩更問天自是皇恩深眷戀
非關臣賦有竒偏情同令伯陳情表志在高平樂志篇
願得王陽長在位且教貢禹過年年

月夜與客飲千人石

千人石上來多矣豈知月夜尤竒偉纖塵不動萬籟寂

冷然一片瀟湘水平鋪寶簾光瑩滑脚踏白雲飛不起
又如藍田種玉生未齊瓊琳琅玕高復低樓臺林影互
虧蔽恍如龍象如狻猊衆賓興起歌且舞持杯互勸行
相携歌聲上過行雲斷舞袖翩躚影凌亂僧房有客竊
睨之疑是羣仙降霄漢生公說法今安在巨石低頭向
人拜一方明月還可庭空色元來本無壞舉杯問月月
不言劍池龍化石依然吳王已去那復管付與吾人一
醉眠

余斷送迎久矣內翰嚴維中奉使三湘還過吳治
具邀余過虎丘余不能辭也賦詩一笑

看徧蒼梧山外山吳中仍愛小孱顏如何地主翻為客
多少榮途未得閒張席坐隈新竹粉題詩剗破古苔斑
夕陽共下山門去處處停橈未擬還

邵二泉點易亭右得泉有詩次其韻

酷憐螭吻瀉寒泉百里曾煩乞剩涓繞舍雙魚驚沼躍
調符單馬罷郵傳不愁海若卑秋水會見宣尼嘆逝川

大易無言原有象定應天一在亭前

錢汝礪院使八十

當年醫國更何人閭闔傳宣入對頻
何事帝心多簡在家傳佐使與君臣

辛巳新春有感

山林朝市本無干怪事驚心欲遣難
金谷多藏還作崇鹿門計拙却為安
始知晏子辭邶殿豈是王晞愛冷官
天與百年雙老眼可堪看徧世途艱

十三絕句

白草茫茫走亂沙
邊風獵獵動胡笳
燕山臺殿雖然好
宣府元來是我家

少年天子重邊功
烏帽戎衣手角弓
行徧漁陽并上谷
並無虜騎到雲中

安化跳梁即日平
中原羣盜敢縱橫
鴻都造亂誰堪使
除是君王自領兵

彭蠡風颿一箭收
九江安慶是安流
說與藩王徐送款

親臣無數要封侯

天子臨江渡六軍長江無浪天無雲笑殺當年魏文帝
武夫空復有千羣

縛得名王氣轉雄凱歌聲裏擁元戎發蹤不用蕭丞相
合與官家第一功

燕雲漠漠鎖重樓八駿驅馳正未休莫道十旬猶不返
金陵原是帝王州

二水三山人豫游八方無事更何憂秦淮流水悠悠在

金
夕
日
人
卷八
好與官家造酒樓

相國移家江水湄
金山望幸已多時
太平金鏡無由進
願得迴鑿一顧之

三顧頻繁亦未聞
金陵東下是金山
分明鐵甕頭邊路
載得賢人與共還

趙普元為社稷臣
君臣魚水更何人
難虛雪夜相逢意
海錯猶堪佐酒巡

北固山前駐翠華
殷勤來訪相臣家
太湖恠石慙多倖

也得相隨載後車

賡歌千載盛明良
宸翰如今更煒煌
漫衍魚龍看未了
梨園新部出西廂

題西湖春景

吳山下瞰西湖水
山外青山相對起
前朝遺跡何處尋
高下亭臺花霧裏
又聞西域靈鷲峰
飛墮西湖東岼東
穿花映柳隱復見
游人如在錦綉之
叢中
上天竺下天竺
三十六峰如立玉
錢塘潮湧雪山來
海門巨浪高如

屋我生山水夙所好咫尺錢塘未曾到未曾到神先游
畫裏見山如舊識前身已侶到杭州何當一日命小舟
載我西湖湖上頭徧覽東風十二樓

寄韓司徒

我昔游京華賢豪並馳騁所晞稷契輩肯顧絳灌等一
朝事勢異雲散江湖迴儵然卧一丘百念付灰冷死生
離合間我志久已冥有如河東公在念獨耿耿公如玄
酒樽澹泊中雋永世途亦堪憐汲短廢脩綆憶忝剡薦

初對判尚書省我言公弗猜公意我先頌公如劍就劘
我若弓受檄退食多賡酬官居無造請雜篇束碎金欲
和輒羞郢豈徒滅坎窞固已絕畦町深情獨先旣苦節
衆尤警言從官四十年一室每懸罄中年已鰥居不惑先
楊秉曾無管蒯從况乃粉黛靚吏人抱衾裯一燈照孤
影朝飭具三韭夕設或脯脰魯山與陽城異世可同境
啜醑彼何人衆醉嘲獨醒謙謙君子心當事尤骨鯁率
衆叩天閭羣邪期盡屏傍觀何脉脉獨立殊挺挺嗟天

獨奚為事變在俄頃逆閹據津要威福恣所逞平生相

許志一旦成畫餅亟褫乃所甘酷罰獨何青我時忝樞

近太息莫能拯俸資或潛輸譬割春鉏脛歸卧汾晉間

甘心混鼃黽卻掃絕梁碣清風播箕頽公既遯蒿萊我

旋謝台鼎吳晉兩閒人萬里星河炯茫茫天地間挂此

東西景蛩蛩失巨虛佇望勞我頸靡由探興居况復承

歎譽欲命淮南駕或放山陰艇出門若有礙大道坐成

梗何時睹至治四國仰嘉靖二鳥復相逢雲天恣游泳

王成憲府博自崑山來為予七十壽成憲時年七十八矣追數京師詩社中人惟予兩人在者感劉禹錫詩因成四首

當年闕下會羣才日日賡歌把酒杯
四十年間誰復在白頭相對有鄒枚

鄴下陳思久已亡應劉徐阮摠堪傷
誰知獨有安陽客

還到吳門舉一觴

成憲安陽都尉門客

題詩倚醉字橫斜
不忍重看感歲華
白髮年來心尚在

手持紈扇索驚蛇

欲唱涼州調未真
米嘉榮後更何人
只今才俊休相笑
曾是文莊席上環

偶成

一日日已去一年年
復來來者如黃河之源
滔滔而不竭
去者如長江之水
滾滾而不回
人生百年復何有
來者去者催相仍
麒麟閣上幾時畫
蓬萊頂上何時登
我聞九州之外有九州
又聞天上五城十二樓
安得挾彼

安期羨門鍾呂輩乘風馭氣同遨遊
下視人世如浮漚
志喜和東之韻

周邦雖舊運維新
歷盡冰霜快值春
天上真人方出震
海濱大老定來臣
奸回已報都從殛
風俗何憂未盡淳
但使遺才收拾盡
不妨垂老太湖濱

天書夜下罷游田
斗覺薰風入舜絃
郢邸一朝潛忽現
蒼生四海負皆蠲
大橫已協重離兆
厄運行辭百六年
從此寰區無一事
朝廷尤望任惟賢

故順菴駱先生挽詞

泮水從游處重來尚宛然古臺猶有栢壞沼已無蓮講
授春風地絃歌夜雨天四方多弟子深媿表新阡

石田學蒙泉閣老畫蒲萄

虬髯詰屈幹鱗皴二老含毫闢出新試看山亭秋雨裏
不知若箇得渠真

虎丘陸羽泉埋沒荒翳久矣高君尹長洲始命疏
濬且作亭其上以表之予賀茲泉之遭也賦詩紀

之


翠壑無聲湧碧鮮
品題誰許惠山先
沈埋斷礎頽垣裡
搜剔松根石罅邊
雪乳一杯分沆瀣
天光十丈落虛圓
向來棄置行多側
好謝東山悟道泉

洞庭有悟道泉甘寒清冽而不與桑

芋翁
之品



震澤集卷八



總校官庶吉士臣張能照

校對官檢討臣王鍾健

謄錄監生臣王永榮